



INATSISARTUT

Aningaasaqarnermut Naalackersuisoq

Ulloq: 29. juli 2020
J.nr.: 01.31.06/20-00895

Aningaasaqarnermut Akileraartarnermullu Ataatsimiititaliap marlunngornermi ulloq 21. juli 2020-mi aalajangiineranik Naalackersuisunut ilisimatitsineq.

Kommune Kujallermi suliffissaaleqinermik akiuinissaq pillugu isumaqatigiisummik atsiuineq, aamma Kujataani aqqusinnermut sanaartornissamut aningaasaliissutinik immikkoortitsineq pillugu tapiliutitut aningaasaliissutit, aamma tamatumunnga sanaartornissamut suliniutip Kommunip Kujallermut tunniunnissaanut pisinnaatitsissut.
– Suliaq nr. 01.31.06/20 – 00895.

”Naalackersuisut **inassutigaa**,

- 2020-mi Konto pingaarneq 87.00.88 Nunaqarfinnut isorliunerusunullu sanaartornissamut periusissiami suliniut 020.29.107 Kujataani aqqusinnermut aningaasaliissutaasut 5,7 mio. kr.-nik amerlineqassasut,
- 2020-mi konto pingaarneq 80.00.10 Sanaartornermut iluarsaassinnermullu aningaasaateqarfimmit utertitani aningaasaliissutit 5,7 mio. kr.-nik ikilisinneqassasut, aamma
- 2020-mut tapiliutitut aningaasaliissutissanut inatsisissatut siunnersuummi oqaasertaliussaq nr. 1 aamma 2, kiisalu konto pingaarneq 87.00.88 Nunaqarfinnut isorliunerusunullu sanaartornissamut periusissiamut oqaasertaliussanut oqaaseqaatit ilanngunneqassasut, takuuk ilanngussaq 1”.

Aningaasaqarnermut Akileraartarnermullu Ataatsimiititaliap oqaaseqaatai apeqqu-taalu:

Qaqortup illoqarfianiit mittarfissamut aqqusinniassatut suliniut pillugu suliaq nutaajunngilaq. Ataatsimiititaliap paasinninnera malillugu aqqusinnermut tassunga tunngatillugu ajornartorsiutit tassaapput kommunip pilersaarutaani illoqarfimmut killeqarfiliussap qulaajarneqarsimannginnera kiisalu aningaasartuutit sanaartornermillu isumaginninneq, kommunit aamma Namminersorlutik Oqartussat (taamanikkut Namminersornerullutik Oqartussat) akornanni 1998-imi isumaqatigiissut maannakkut atuuttoq naapertorlugu isumagineqartussat pillugit apeqqut. Nunaannartami sanaartornerit pillugit kommunit Namminersorlutillu Oqartussat akornanni 1998-imi isumaqatigiissutit iluarsartuuteqqinneqarnera suli maannamut naammassinngitsoq Naalackersuisunit ilisimatitsissutigineqarpoq. Taamaammat ataatsimiititaliap isumaqarpoq nunatta kujataani aqqusinnermik sanaartornermut ilassutitut aningaasaliissutinik immikkoortitsinissaq pillugu suliamik suliarinninnissamut, sanaartornermillu suliniummut akisussaaffimmik Kommune Kujallermut tunniussinissamut siusippallaartoq. Tamatuma saniatigut konto pingaarneq 87.00.88 taamaallaat sanaartornermik suliniutinut kommunimut aningaasaqarnikkut akisussaaffiliiffiunngitsunut atorneqarsinnaavoq.

Taamaammat aqquserniorluni suliniummut aningaasaliissutit amerlineqarnissaannik inassuteqaat ataatsimiititaliamit akuersissutigineqarsinnaangilaq. Taamatuttaaq oqaasertaliussaq 1-imik 2-millu ilanngussinissamik inassutit ataatsimiititaliamit akuersissutigineqanngillat.

Oqaasertaliussaq 1 suliaqartinniakkanik ilisimatitsererluni neqerooruteqartitsinermut aningaasaliissuteqarnermut tunngassuteqarpoq. Oqaasertaliussaq 2 Kommune Kujallermut tunniussinissamut tunngassuteqarpoq. Naalakkersuisunit inassuteqaatit kingunissaat ataatsimiititaliamit ilisimaneqanngillat. Ataatsimiititaliaq isumaqarpoq kommunini allani assingusunik suliassaatilinnut tunngatillugu suliap najoqqutatut atorneqaleratarsinnaasoq.

Naalakkersuisut paasissutissiissutigaaat Qummut aqqummut, suliamut matumunnga tunngassuteqartumut 2017-imi C-mik missiliuusiortoqarsimasoq. Sooq suliamut matumunnga tunngatillugu B-mik missiliuusiortoqarsimannginnersoq nassuiaatigeqqullugu Naalakkersuisut ataatsimiititaliamit qinnuigineqarput?

Assersuutigalugu suliniutit missingiummik B-mik ilalimmik eqqortumik erseqqissarneqarnerannik suli peqartinnagit aningaasanut inatsimmi aningaasaliissutitalerlugit ilanngunneqartanninnissaat siunertaralugu, suliassaqarfimmu 80-89-imut, sanaartornermut tunngasumut oqaasertaliuissaq nr. 3 ilanngutsinneqarsimavoq.

Suliattaq matuma qanoq COVID-19-ip tunillaassuunnerata malittuatut suliassaqartitsiniarnermik iliuuseqarnermut toqqaannartumik attuumassuteqarsinnaanera ataatsimiititaliamit takujuminaatsinneqarpoq. Ataqtigiinnermik taamaattumik nassuiaatiginneqqullugit Naalakkersuisut qinnuigineqarput.

Ataatsimiititaliap isumaa malillugu aqqusineq pisariaqartinneqarpoq, kommuninulli isumaqatigiissutip ilusilerneqarnera malillugu suliassaq taanna ataatsimiititaliap isumaa malillugu kommunip ataaniippoq. Ataatsimiititaliap isumaa malillugu sumiiffinni suliassaqartitsiniarnermik iliutsit Kommune Kujallermut tamarmut siammarterneqartariaqarput, tamanna aamma pingaarnertut illoqarfiup Qaqortup avataanut.

Aningaasaliissutit corona pillugu suliap nassataanik utertinneqartut sapinngisamik inuiaqatigiinnut iluaqutaanerpaanissaat anguniarlugu nunamut tamarmut siammarternerullugit atorneqarnissaat ataatsimiititaliamit kissaatigineqarpoq. Taamaallutik Naalakkersuisut Kommune Kujallermik tamarmiusumik isiginninniaasariaqarput. Qanoq aningaasaliissutit kommunimut tamarmut naligiinnerusumik agguataarlugit suliassaqartitsiniarnikkut sapinngisamik pitsaanerpaamik angusaqartoqarsinnaanera misissorneqartariaqarpoq.

Nunap immikkoortuani suliffissaaleqiffiusuni suliffissaaleqisoqarneranik akiuiniarluni iliuussisanut aningaasaliissutissanut qinnuteqaatinik ataatsimiititaliaq takorusoqaaq. Ataatsimiititaliap maluginiarpaa nunatta kujataani sanaartornernut aningaasanut inatsisikkut aningaasaliissutit amerlanerpaat illoqarfiit pingaarnersaanni Qaqortumi atorneqarsimasut. Ataatsimiititaliap isumaa malillugu iliutsip sunniutaa sumiiffinni suliffissaaleqiffiuutigalutik sulisussaaleqiffiusuni suliffissaqarniarnikkut periarfissaqarluareersuni annikinnerusaaq. Sumiiffinni suliffissaaleqiffiusuni suliassaqarniarnikkullu annertuumik ajornartorsiuteqarfiusuni iliutsinik aallarnisaanissaq pitsaanerpaassaaq.

Naalakkersuisut ataatsimiititaliap siuliani oqaaseqaataanut apeqqutaanullu oqaaseqaateqarqullugit ataatsimiititaliamit qinnuigineqarput.

Aningaasaqarnermut Akileraartarnermullu Ataatsimiititaliap aalajangiinera
Siuliani allassimasutut oqaaseqaateqarluni Naalakkersuisut inassuteqaataat Aningaasa-
qarnermut Akileraartarnermullu Ataatsimiititaliamit **akuersissutigineqanngillat.**

Inussiarnersumik



Hermann Berthelsen

Aningaasaqarnermut Akileraartarnermullu Ataatsimiititaliap Siulittaasua